

INUIT ATAQATIGIIT INATSISARTUNI



08. August 2022

UKA2022/29

Inatsisartut Suleriaasianni §33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaanni illunut inissianullu Radon-ip qinggorneranut illersuutilersuinissamut periarfissanik misissuititsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup imarissavaa pisortat ingerlataanni illuni aamma naammineq illuni inissianilu pisortanit pigineqartuni arlalinni periarfissarsiornissaq. Kingusinnerpaamik 2023-mi ukiaanerani ataatsimiinnermi misissuinnermit innersuussutit saqqummiunneqassapput.

(Inatsisartunut ilaasortaq, Mariane Paviasen, Inuit Ataqatigiit)

Tunngavilersuut:

Ilisimaneqarpoq Radonip qinggorneri Narsami, Qaqortumi Nuummilu annertuumik ajornartorsiutigineqartut. Ilisimaneqarpoq ajornartorsiut Narsami annerpaasoq. Radon peqqissutsimut navianartorsiortitsivoq, ullumi ilisimasat tunngavigalugit ilisimaneqarpoq inini inuit isersimaarfigisartagaanni Radon-ip qinggorneranut illersuutilersuinissaq pisariaqartoq.

Namminersorlutik Oqartussat siornatigut innersuussuteqarnikuuvoq nammineq illuutigisani Radon-imut illersuusernissaq, aamma innersuutigineqartoq Narsami innuttaasuniit amerlasuuniit malinneqarsimavoq. Ajoraluartumik illut amerlasuut Radon-imut illersuuserneqarnikuunngillat.

Taamaammat ersarippoq paasissutissanik imalinnik quppersagaaqqanik agguaasimaneq naammangitsoq, taakku siunnersuutinik innersuussutinillu imaqarput. Taamaammat pisariaqarpoq Naalakkersuisut aqqiissutissanik allanik

INUIT ATAQATIGIIT INATSISARTUNI



qinaasisariaqalernerannut, soorlu paasititsiniaanerit aamma
aningsaleeqataaneq.

Narsami illuutillit arlaqalersut soraarningornikuupput, taamaattoq
imaaliallaannaq angerlarsimaffitsik Radon-imut illersuusernissaannut
akissaqaratik, aamma innuttaasut ilaat aningaaserivimmi aningaasanik
taarsigassarsinissaminnut periarfissaqanngillat.

Taamaammat illuutillit ilaqarput ernialersugaanngitsunik
taarsigassarsinissaminnut pisariaqartitsisunik aamma aningaasatigut
taperneqarnissaminnut. Siunnersuutigaara Naalakkersuisut ukiaanerani
ataatsimiinnermi 2023-mi qanoq aningaasalersorneqarnissaanut
saqqummiissasut.

Tassunga atatillugu siunnersuutigaara Naalakkersuisut
periarfissanngortissagaat, Namminersorlutik Oqartussat nammineq illuutilinnut
aningsaleeqataaneq tapiissutinik tunniussinissaminnut Radon-imut illersuutinik
pilersuinissamut. Siunnersuutigaara periarfissaq kingusinnerpaamik Januar
2024-mi atuutilereersimassasoq.

Taassuma saniatigut aamma Namminersorlutik Oqartussat sukkanerpaaq
atorlugu Narsami, Nuummi Qaqortumilu sanaartukkani Namminersorlutik
Oqartussanit pigineqartuni Radon-imut illersuusersuineq ingerlanneqassasoq.
Imaappormi inuttut pisinnaatitaaffiit ilagaat peqqissutsimut
ulorianartorsiortitsiffiunngitsumik angerlarsimaffeqarnissaq. Attartortut
attartornermini akiliuteqartarput, aamma Namminersorlutik Oqartussat
akisussaaffigaat inissiat attartortakkat peqqissutsimut
ulorianartorsiortitsissutaannginnissaat. Taamaammat siunnersuutigivara
Namminersorlutik Oqartussat akisussaaffigissagaat sukkanerpaamik Radon-
imut illersuutinut pilersuinissamut pilersaarut suliarissagaat.

INUIT ATAQATIGIIT INATSIARTUNI



Pisortanut aningaasatigut allaffissornikkullu kingunissai:

Siunnersuutip atuutsikkiartuaarnissaanut piumasaqaataassaaq,
Naalakkersuisunit misissuisitsinissaq piumasarineqassasoq.
Naatsorsorneqarpoq allaffissornikkut aningaasartuutissat AC marluk ukiumut
suliarisinnaasaasa naatsorsornerata nalinga sinnerneqassanngitsoq, tassaasoq
1. mio kroner.

Namminersorluni inuussutissarsiuteqartunut aningaasatigut allaffissornikkullu kingunissai:

Soqanngilaq.

Innuttaasunut aningaasatigut allaffissornikkullu kingunissai:

Soqanngilaq.